

Ya hulat ni apostol Pablo kan Tito

Paunan habi

Habaytsi ay hulat ni apostol Pablo kan Tito, ya mihay alwan Israelita ya ampaniwala kan Apo Jesu-Cristo gawan ha toro ni apostol Pablo (Tito 1:4). Hi Tito ay kalamo lan apostol Pablo hên naniraw hila ha Jerusalem (Galacia 2:1). Hiya êt ya in-utoh ni apostol Pablo hên mamaala ha pamitsi-tsipon hên maihawop lan taga-Corinto kanlan patêl ha Panginoon ha Jerusalem (2 Corinto 8:6, 16-24). Hiya ya imbalag ni apostol Pablo ha Pulo hên Creta ta êmén ya mamaala kanlan ampaniwala kan Apo Jesu-Cristo ya angkapi-tsi-tsipon bayro. Di ha hulat ay inaralan ni apostol Pablo hi Tito hên tungkol ha dapat nan daygên bayro.

Kabooan hên pinakalaman

Ya umpisan hulat 1:1-4

Ya payo ni apostol Pablo kan Tito, no ay-êmén mamaala kanlan patêl ha Panginoon ha pulo ya nag langan Creta 1:5-16

Ya kangérān ya dapat itoro kanlan nagpalokop kan Apo Namalyari 2:1-15

Ya dapat mag-in pamimiyay lan ampaniwala kan Apo Jesu-Cristo 3:1-11

Tawlin habi 3:12-15

Ya umpisan hulat

¹ Hiko hi Pablo ya mihay ampaghuyó kan Apo Namalyari, haka hikoy nag-in mihay apostol ni Panginoon Jesu-Cristo.

In-utoh na ko ni Panginoon Jesu-Cristo hén mataniéh hén paniwala lan pinili na hén mag-in kana, haka êmén êt mamipamwang kanla hén kaptégan. Ta hata kaptégan ay ampampadyag kanla hén kalabayan na. ² Habaytsi ya kaptégan, ya ampaniwal-an la, ay ampam-i kanla hén kasiguradoan ya hila ay madyanan biyay ya ayn angga, ha langit. Hén a na pon dinyag ya hata luta ni Apo Namalyari, ya a manloko, ay nangako ya, ya idin na ya biyay ya ayn angga kanlan magpalokop kana. ³ Ha takdan panaon, ay namipamwang hi Apo Namalyari, ya Mámiligtas tamo, hén hata pangako nay biyay ya ayn angga, haka na impatsiwala kangko etaman, hén itoro ya habayto gawan in-utoh na ko.

⁴ Anhulatan kata, Tito, ya nanad kon mantêg anak gawan ha paniwala ta.

An-ihalangin kata ya dyanan ka dayi hén kapatékbékan nakém, haka ingalwan ka ni Apo Namalyari ya Tatang tamo, haka ni Panginoon Jesu-Cristo, ya Mámiligtas tamo.

Ya payo ni apostol Pablo kan Tito, no ay-êmén mamaala kanlan patêl ha Panginoon

⁵ Imbalag kata ha Creta, ta êmén mo yarién ya a pon nayari. Ha balang balayan ya main patêl ha Panginoon, ay mamili ka hén toa ya mamaala kanla hén nanad ha in-utoh kina kamo. ⁶ Hilay pilién mon mamaala ay hatoy angkahélek ha biyay la ya a hila ampanyag kasalanan, haka

mimihay ahawa la. Ya maának la etaman ay dapat main paniwala ha Panginoon, dapat alwa hilan mapanyag karawakan, haka alwan mapanhumalanghang ha matoa kanla. ⁷ Kanlan am-pamaala ha pamit-tsi-tsipon lan patêl ha Panginoon, ay dapat ayn mahélék ya hinon kapintasan, ta hila ay pinatsiwal-an hén maghuyo kan Apo Namalyari. Dapat alwa hilan mapagmatag-ay, alwan mapaghuluk, alwan mapamminém alak, alwan tulawén, haka alwan kamata hén pera. ⁸ Noa, ya dapat kanla ay mahiglan mamahowén hén bisita, mapanyag kangéran, natoay ihip, hépat makilamo ha kapareho, mapanyag kalabayan ni Apo Namalyari, haka mapamigil ha sarili. ⁹ Dapat lan pakapaniwal-an ya kaptégan ya an-itoro ta, ta êmén la mapataniêh ya nakém hén kaatag ha naahig ya toro, haka mahabyanan lay anhumalanghang ha pêtêg ya toro.

¹⁰ Ta main mal-at ya anhumalanghang haka ampanloko, ta ya toro la ay ayn alagá, lalon-laloy na kanlan Israelita ya an-ipalékpék ya dapat patuli hilay ampaniwala kan Panginoon Jesu-Cristo, no labay la hén madyanan hilan biyay ya ayn angga. ¹¹ Yabay hilay habaytoy ampanoron bat, ta êmén hila makakwa hén pera ya para ha sarili la. Hila ay dapat patégénén hén manoro, ta main ungnoy pamilya ya angkaguloy nakém gawan ha pamitoro la hén alwan dapat itoro. ¹² Mihay propeta lan taga-Creta ay naghabi, ya wana, “Hilay taga-Creta ay panay hén ampaglaram, haka nanad hilan ayop ya kapalimo, mangahiba haka mangatamad.” ¹³ Habayto ya hinabi na ay pêtêg.

Kabay habyanan mo hila hêñ mahakit, êmêñ mag-in naahig ya paniwala la. ¹⁴ Daygêñ moy habayto ta êmêñ maalih ya paniwala la ha istoryan Israelite ya didinyag lan bêngat, haka ha pan-itoro lan tawo ya nanalibokot ha kaptêgan. ¹⁵ Hilay malinis ya kaihipan, ay ampamitad malinis ya balang hino, noa, hilay narawak ya kaihipan haka ayn paniwala, ay ampangihip hêñ ayn malinis, ta ya ihip la boy nakêm la ay narawak. ¹⁶ Anhabiên lan habaytoy nangarawak, ya nagpalokop hilay na kan Apo Namalyari, noa, ayn kaptêgan ya habayto, ta ampanyag hilan karawakan, haka an-humalanghang hila kana. A hila ampakadyag hêñ kangêran.

2

Ya kangêran ya dapat itoro kanlan nagpalokop kan Apo Namalyari

¹ Hika etaman, Tito, dapat panay mon itoro ya naahig ya kaptêgan. ² Toroan mo hilay toay lalaki hêñ a la honolêñ ya narawak ya kalabayan hêñ lawini. Kailangan mapagpgil hila ha sarili, haka kailangan mag-in natoay nay ihip la. Dapat pakapaniwal-an la ya pêtêg ya toro, dapat lan pakalugurên ya kapareho lan tawo, haka dapat lan têêhêñ ya hinon kairapan. ³ Embayro êt ya habiên mo kanlan toay babayi, ya dapat hilan manyag hêñ hépat kanlan nagpalokop kan Apo Namalyari. Paan hilan mamiyakaw-yakaw hêñ maniran kaatag, haka paan hilan mag-in mapam-minêñ alak, noa, ya dapat ay mangitoro hila hêñ

kangérān. ⁴ Ha êmbayroy dyag la, ay matoroan la hilay alwa pon mantêg toa ya babayi hēn manlugud hēn ahawa la haka maának la. ⁵ Matoroan la hila etaman hēn mag-in mapagpigel ha sarili, panay hēn manalibokot ha kasalanan, magpakahipêg ha bali la, haka magpasakop ha ahawa la. Dapat lan daygēn ya habayto ta êmēn a mapintasan ya habi ni Apo Namalyari.

⁶ Êmbayro etaman pakahabyanan mo hilay alwa pon mantêg toa ya lalaki ya mag-in hila dayin mapagpigel ha sarili la. ⁷ Hika etaman, ay dapat panay kan manyag kangérān, ta êmēn la mamwan-gan hēn kaatag ya dapat lan daygēn. Paan mon daygēn kamungaw ya pangitoro mo, noa, ipakatoro mo ya kaptêgan. ⁸ Dapat pêtêg ya kaganawan ya an-itoro mo, ta êmēn mipakarêng-êy hilay an-humalanghang kamo, gawan ayn hilan mahabi kantamo.

⁹ Pakahabyanan mo hila etaman hilay ipoh hēn palokop hila ha amo la ha hinon ipadyag kanla, ta êmēn la pahiglaên ya amo la. Dapat alwa hilan matobag. ¹⁰ Paan lan panakawan ya ámo la hēn hinoman, noa, ya dapat, ay panay hilan mapagtisiwal-an. No êmbayro ya daygēn la, ay purién hēn balang miha ya toro ya tungkol kan Apo Namalyari, ya Mámiligtas tamo.

¹¹ Madyag dayi ya hata hinulat ko, gawan impamwang ya ayn kapantag ya ingalo ni Apo Namalyari, ya ampam-in kaligtasan ha hino-hino kay na hēn ya tawo. ¹² Habaytoy ayn kapan-tag ya ingalo ni Apo Namalyari, ay makapiakay kantamo hēn manalibokot ha pamimiyay ya al-wan maka-Diyos, ta êmēn kitamo mag-in ma-

honol ha kalabayan ni Apo Namalyari, mapag-pigil ha sarili, haka êmén mag-in hépat ya pamakilamo ha kapareho tamo kaban atsi kitamo pon bayri ha luta. ¹³ Ta êmbayro ya dapat tamon ugalién kaban an-êngganan tamo ya pangubatan hén hadyay kahiglaan tamo. Yabay ya pay-iltaw hén kapahilêw ya kahampatan hén panga-Diyos ni Apo Jesu-Cristo ha pag-orong na di. Hiya ya makapangyarihan ya Diyos tamo, haka hiyay Mámiligtas tamo. ¹⁴ Indin nay sarili na ha pangakbus kantamo, ta êmén na kitamo mialih ha pamanyag hén kaganawan karawakan. Nilinisan na kitamo hén mag-in kana, ta êmén kitamon humipêg hén manyag kalabayan na.

¹⁵ Atsi kamo ya tungkulan hén itoro ya habayto. Yakaatag ay dapat mon pakhawên ya nakêm, haka ya kaatag ay dapat mon habyanan. A mo hila paulayan hén musmusên la ka.

3

¹ Ipaihip mo kanla bahên ya palokop hila kanlan main tungkulan. Dapat honolên la hila, haka kailangan panay hilan nakal-an hén manyag kangérān. ² Paan hilan maghabi hén ikahira hén hinon tawo, haka dapat paan hilan panay hén makihubak. Noa, dapat manlugud haka gumalang hila ha balang miha. ³ Gawan hén hato ay hikitamo man, ay ayn kitamon muwang ya tungkol kan Apo Namalyari. A tamo ya anhonolên, haka tampol kitamon angkagtan ha alwan kangérān. Ampakihonol-honol kitamo pon ha nangarawak ya kalabayan ya an-ikapdan bêngat hén lawini tamo. Ya angkahêlêk pon ha

biyay tamo hên hato ay nangarawak ya pangingi-hip, karidyaan, haka hêmêk. ⁴ Noa, hên impamwang kantamo ya kangêran haka paman-lugud ni Apo Namalyari ya Mámiligtas tamo, ⁵ ay iniligtas na kitamo ha kaparusaan. Ya pangiligtas na kantamo, ay alwan gawan ha pamanyag tamo hên kangêran, noa, gawan ha ingangalo na. Hikitamo ay in-anak oman gawan ha panlinis na kantamo. Haka ya Espiritu ni Apo Namalyari ay nam-i kantamon bayoy biyay. ⁶ Gawan kan Apo Jesu-Cristo ya namiligtas kantamo, ay boon nakêm nan impahapat kantamo ni Apo Namalyari ya Espiritu na. ⁷ Embayroy dinyag na, ta êmên na kitamo itad hên ayn kasalanan gawan ha ayn kapantag ya ingalo na, haka ta êmên na kitamo dyanan hên kasiguradoan hên biyay ya ayn anggaan, ya an-êngganan tamo.

⁸ Pêtêg ya habayto ya inhulat ko. Kabay ipakatoro mo hên mimihay ihip mo ya habayto kanlan ampaniwala kan Apo Namalyari, ta êmên hila magpakadyag hên kangêran. Habayto ay manggêd haka mapakinabangnan la. ⁹ Dayuán mo ya pamikotang la ya ayn kapukatan ya tungkol ha listahan hên ninuno la. Dayuán mo etaman ya ayn kapukatan ya pамиistorya haka ya pами-huhubak la hên tungkol ha Kautuhan ni apo Moses. ¹⁰ Paghabyanan mo hilay ampangubatan hên hubakan, gawan alwan pêtêg ya toro la. No katalwa mo hilay nan pinaghabyanan, ta a hila manggilam ay ayn nanan madyag. Dayuán mo hila tana. ¹¹ Ta muwang mo ya êmbahêñ ya tawo ay mangarawak, haka ya kasalanan la, ay am-

pamaptêg ya alwan mangêd ya andaygêñ la.

Tawlin habi

¹² Iutoh ko kamoyu hi Artemas, o hi Tiquico. Pamilatêng na bahêñ ay pakikwanan mon tupaêñ mo ko ha Nicopolis, ta ya labay ko ay bayro kon maglaêh ha kawran. ¹³ Pakikwanan mon hawpan hi Apolos haka hi Zenas ya abogado* ta êmêñ hila tampol makabita. Siguradoêñ mo êt ya a hila am-pagkulang ha kaganawan kailangan la. ¹⁴ Hilay patêl tamo ha Panginoon, ay panay mon toroan hêñ manyag kangêran, haka mag-in mapanawop ha hinoman ya ampangailangan, ta êmêñ ya biyay la ay main pakinabang. ¹⁵ Angkumustaêñ ka hêñ hilay kalamo ko di. Ikumusta mo kay etaman kanlan ampanlugud kannaêñ, ya hilay patêl ya nagpalokop ha Panginoon.

Ingawan kaw dayi ni Apo Namalyari.

* **3:13** mamakidungot hêñ kaso ya bayaran hêñ main kaso.

Ya habi ni apo namalyari: Bayon tsipan - Ayta Mag-antsi

New Testament in Ayta, Mag-antsi

copyright © 2006 Wycliffe Bible Translators, Inc.

Language: Mag-antsi Ayta (Ayta, Mag-antsi)

Translation by: Wycliffe Bible Translators

Contributor: Wycliffe Bible Translators, Inc.

Copyright Information

© 2006, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789718260654

The New Testament

in Ayta, Mag-antsi

© 2006, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

x

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

PDF generated using Haiola and XeLaTeX on 11 Nov 2022 from source files
dated 29 Jan 2022

d2289d90-e8af-5f04-a1e1-312fd0921aff